

張文襄公奏議

張文襄公全集卷十三

奏議十三

籌議大治水師事宜摺

光緒十一年九月初五日

竊臣承准軍機大臣字寄光緒十一年五月初九日奉  
上諭現在和局雖定海防不可稍弛亟宜切實籌辦善  
後爲久遠可恃之計前據左宗棠奏請旨敕議拓增船  
礮大厰昨據李鴻章奏仿照西法創設武備學堂各一  
摺規畫周詳均爲當務之急自海上有事以來法國恃  
其船堅礮利橫行無忌我之籌畫備禦亦嘗開立船厰  
創立水師而造船不堅製器不備選將不精籌費不廣

上年法人尋衅疊次開仗陸路各軍屢獲大勝尙能張  
我軍威如果水師得力互相援應何至處處牽掣當此  
事定之時懲前毖後自以大治水師爲主船廠應如何  
增拓礮臺應如何安設槍械應如何精造均須破除常  
格實力講求至於遴選將才籌畫經費尤應謀之於豫  
庶臨事確有把握著李鴻章左宗棠彭玉麟穆圖善曾  
國荃張之洞楊昌濬各抒所見確切籌議迅速具奏江  
蘇廣東本有機器局福建本有船廠然當時僅就一隅  
創建未合全局通籌現應如何變通措置或扼要設總  
匯之所或擇地添設分局以期互相策應呼應靈通並

著李鴻章等妥議奏辦總之海防籌辦多年糜費業已  
不貲迄今尙無實濟由於奉行不力事過輒忘幾成錮  
習該督等俱爲朝廷倚任之人務當廣籌方略行之以  
漸持之以久毋蹈常襲故摭拾從前敷衍之詞一奏塞  
責李鴻章左宗棠摺著分別鈔給閱看將此由六百里  
各諭令知之欽此仰見聖天子澄清海宇安不忘危此  
誠今日第一要務所當合天下之全局而殫精併力以  
成之者也竊惟戰守兩事義本相資故必能海戰而後  
海防乃可恃三十年來環地球諸國無不以船礮爲強  
國之計卽蕞爾之倭亦且經營恐後獨中華以物力不

給之故歷年設廠購船僅開其端未暢其用自去年用兵以來海上攻守得失之故中朝士夫邊疆將帥皆已曉然今雖越事略定而外患方殷法逼滇桂俄窺琿春且俄與倭爭朝鮮英與俄爭印度英與德又復分踞朝鮮各島伺便攘臂於其間四夷鬪爭於中華洋面而我亦將受其敝故海防諸大端天時人事無可再緩臣於五月二十五日陳奏海防要策疏內聲明快船巨艦另籌辦法專疏上陳適奉諭旨飭議謹竭其愚慮通籌全局切實核計分條臚舉敬爲我 皇太后 皇上陳之一日分地中華洋面北起吉林南訖欽州延袤萬里不

比長江水師止二千餘里江面可以一提督統之若將海上水師合爲一軍勢有難行海闊路遠呼應不靈一也沙礁口岸一將難悉二也操練勤惰督察難周三也沿海有警不受調度四也稟報遙度虛實難憑五也需才太多一區難備六也竊謂宜分爲海軍四大枝北洋爲一枝旅順煙臺瑯春屬焉南洋爲一枝浙江屬焉閩洋爲一枝臺灣屬焉粵洋爲一枝瓊州屬焉所轄洋面各有專責遇有大敵仍責令各枝合力攻擊互相援應每枝設海軍統領一員左右翼分統各一員轄於統領官階暫不拘定以便斟酌人材其統領應令中外大臣

各舉所知上聽朝廷簡擇任用其分統應由各統領自擇奏明派委俟規模大備再議設立額缺或卽名爲某洋海軍提督左右翼總兵均聽該洋面督撫節制調遣而統隸於京師以總理衙門總統四枝以便通計度支權衡緩急整齊規制選擇人材譬如前代本兵之職總司調度天下兵馬而各省諸鎮仍受各省節制若不兼歸本省調度考察有警之時必致擇便觀望遇急不赴捏報遇風擱淺遇敵獲勝貽誤戎機一日購船鐵甲巨艦工用繁重算理精微中國工廠未備非數年之內所能學製僅一閩廠卽製亦不能多粵廠甫學淺輪難求

速效惟有購之外洋以應急粵洋海軍一枝擬配水帶  
鐵甲船三艘鐵甲魚雷船六艘每一鐵甲巨艦兩鐵甲  
雷船爲一隊統領左右翼各領一隊三隊合爲一軍水  
帶鐵甲者德國伏爾鏗廠新創之式不用全身鐵甲止  
於水淺上下數尺及旋臺八角臺上加鋼面鐵甲其不  
甚要害處所則略省鐵甲安大礮五前爲旋臺礮一中  
爲八角臺四隅各礮一魚雷筒四首一尾三據西人及  
曾出洋者言之皆謂此式頗善比定遠所費較省鐵甲  
魚雷船者德廠新創於船首施鐵甲既可攻鐵艦又可  
禦哈乞開思連珠礮並安大礮一尊此爲最新最利之



船而費不甚多若有三水帶鐵艦六鐵甲雷船合爲一軍可以一戰有如此者四軍不難縱橫洋面摧破強敵度財量力中國尙能辦此快船較廉隨後酌增配用設海面有事敵緩則一軍獨禦敵盛則諸軍合攻惟此係臣一人管窺之見因一粵以推之全局既審船力兼計財用斟酌通籌約計船式船價擬爲此策以備采酌至南北洋閩或已有鐵艦或自有船廠應配何等船隻自必各有精思良策應由各該疆臣酌辦惟戰艦必須有港口可以收泊有礮臺可以助護方能操縱如意中華海口除虎門深廣可容巨艦津閩臺及廉瓊各口鐵艦

皆不能收入吳淞潮退時亦不能入我船若少懸泊外海必受敵船圍攻若僅製快船收口則便出洋縱擊當敵之巨艦則難故鐵艦不宜甚少方能在海面結陣自固一曰計費上項所稱水帶鐵甲船每艘約需銀一百萬兩有奇現與德國出使大臣許景澄電商屬其與該廠酌式議價參用各式務求盡善擬每一艘以一百萬兩爲率三艘并雷礮電燈之屬約需三百六十萬兩鐵甲雷船每艘約九萬兩六艘并雷礮約需七十八萬兩大小九船并械約共四百三十餘萬兩洋例買多則價減若承辦之員清廉核實將經手茶金五釐提出歸公

約計四百萬必能辦此設或船式尙可酌改再能多省卽以所餘湊製快船以備廉瓊淺海之用大抵一軍以四百萬兩爲率四軍共需銀一千六百萬兩惟工作之良楮價值之貴賤全視乎人造船無非英德兩廠粵船臣當與許景澄暨會紀澤熟商圖式博詢厥價諮訪水師名手慎重舉辦以期工良價實一曰籌款大舉鉅款斷非枝枝節節所能辦頃接會紀澤咨知洋藥稅釐併徵一節已經議妥剋期開辦除正稅三十兩外計每箱徵併釐八十兩每年中國入口洋藥約計實有八萬箱以外若能杜絕偷漏計每年可徵併釐六百四十萬兩

此等洋關鉅款正宜作洋防之用計五年可得舊有新  
增藥釐共三千二百萬兩較舊收釐數捐數約增一倍  
擬提出五年收數之半銀一千六百萬兩每年三百二  
十萬兩以爲造船專款不分何口所收統提統用惟各  
省向徵藥釐及各項捐抽皆有待用之款今擬設海軍  
四枝粵洋爲四軍之一用款亦應得四分之一就四分  
之一一百六十萬兩內劃提一半應得八十萬兩五年  
適得銀四百萬兩各口併計共得一千六百萬兩恰敷  
造船之用餘仍留作本省向來支銷及他項撥用若每  
年所收不及六百四十萬總以分半劃提爲度五年不

足則以六年續成之各口收數未能一律應請通盤合  
計以每年各口統提一半爲率蓋北洋爲神京拱衛南  
洋乃南北咽喉間有孤懸之臺敵所窺伺而粵爲諸蕃  
入華之首衝七省洋面之鎖鑰水師之設無一可緩必  
有此鉅貲專款通力合作則水師可望必成一曰定銀  
洋例貨價議妥先付三分之一貨成起運又付三分之一  
一貨到付清亦間有定銀略少者或付五六分之一分  
五六次交價惟第一次定銀若少則第二次付價須早  
此項船礮價一千六百萬兩定銀五分之一須三百二  
十萬兩尙宜另籌擬請由戶部墊八十萬飭出使大臣

在該國銀行暫借八十萬或卽在該船廠挪墊認息更爲簡易向有如此辦法約期一年俟藥釐收獲陸續匯還今戰事已息無人居奇大約四五釐息卽可籌借一年卽還受累尙輕計墊借共一百六十萬餘分令四川湖北湖南江西安徽沿江五省限數勸捐以足此數兩江督臣曾國荃原奏會有五省協濟之議若以捐爲協似更覺有可措手至沿海七省海防多費應免認捐其腹地五省每一省認捐三十二萬兩共一百六十萬由部頒發實官空白照若干張仰懇天恩准予於現定減成數內再減二成聲明此捐專爲購辦鐵甲船之用此

數滿後卽行截止不准減成國家恩澤人人至深各省士民近年目擊海氛咸懷義憤知此舉關係中外大防且又核給實獎優予減成必當同思敵愾踴躍輸將定銀早集則船工速蒔此項部墊之款於五年外船價交足後由各關洋藥加釐項下分年扣還一曰養船自定議開工之日起兩年後各船陸續來華卽須籌養船之費五年之後卽將此提半造船之藥釐約三百二十萬兩仍分四股以充四枝海軍將卒師匠及修船之費應俟臨時籌議章程奏明請旨辦理所餘仍當撙節積存以充續造新式堅利戰艦之用一曰修船巨艦兩年必

須一修故製船必先製澳工費甚鉅一澳需費數十萬造成亦須二三年且必在設有礮臺防衛完密之地粵省黃埔船澳淺窄當徐籌開拓之計香港現有英商新造極大船澳兩年外可竣粵澳未成粵船或可暫向香港修理各省有無可作大鐵艦船澳之所應請敕下各該省預籌備用一曰練將中華水陸學堂津滬間本有規模粵省現始創議奏請撥款開辦俟籌有定款自當選擇師生認真講求惟讀書考索成效迂緩百聞不如一見古有明箴擬選派精壯用心之員弁生徒出洋習練其一途隸於出使大臣分發各國學堂水陸營伍礮



臺船廠分科學習其一途駕坐練船周歷華洋各海口  
先中後外藉以周知諸邦口岸形勢戰船規制練習風  
濤駕駛練船卽爲學堂兼可講習諸藝向來習西學者  
皆取聰穎少年爲之取其語言文字易於通曉臣愚以  
爲戰陣之道膽先藝後習藝術則但取聰悟習戰陣則  
先在勇敢否則聞礮而伏見敵而避藝學雖精會有何  
用故文弱學徒卽使各技精通只可以備船中專門職  
司之用臨時主持調度禦敵涉險仍須勇將壯夫方有  
實際此項出洋員弁文者先取其志趣端正書理明通  
武者先取其膽勇過人或經戰陣但能耐勞不拘年齒

雖洋文算術未能造微但得其戰守布置大端卽已足  
用惟粵省從無能出外國洋面之船此時海氛旣平南  
北洋快船尙多應請敕下南北洋酌撥完固寬大兵輪  
一艘以備駛用其養船之費卽由粵支至於京秩旗營  
人員似可由總理衙門每年揀發一二十員分赴各國  
分門學習回華後考其所能分等優獎所費非鉅裨益  
宏多一曰船廠閩廠規模已備自可由此開拓竊揣快  
船一種閩廠生徒當所優爲滬廠亦略有憑藉惟粵省  
本無船廠本年春間創造淺水兵輪乃因海氛猖獗積  
激試辦旣無舊基亦無經費目前粵省餉力大困又須

籌辦購戰船設槍廠築礮臺等事尙無所措船廠實有未遑竊擬俟新造淺輪四艘告成後察看利病如何當設法專籌一小款每年酌造兩三隻由粗入細積少成多俟藝熟工多再當騰挪財力定議大舉五年之內暫且購之外洋一曰礮臺臺船相輔其功乃彰西式之臺不一或尖或圓或蓋或露或作聯堡子堡或陸路當衝作大礮壘可以啟閉往來或水路當衝作浮礮臺可以迎頭擊敵此兩式最得力而費太重或以鐵或以石或以紅毛坭鐵最堅而最費遽難仿造粵東省防虎門內外一路年來新造各臺略有規模雖不能盡合西法然

已不沿舊式其間參差不齊闕略未備惟有隨時量力  
修改增補其五門要隘現已另籌辦法續行另摺具奏  
至廉瓊海口爲南洋第一重門戶關繫最重急須堅臺  
巨礮惟工費太鉅此次專疏奏陳考西人之論礮臺法  
式甚多其淺顯而緊要者約有數條一山坳嶺曲隱蔽  
擊敵不宜孤露一臺外須作坦坡不得壁立一扼要處  
須有數臺犄角不宜聚礮於一臺一連臺多作犬牙形  
以便兩臺礮力相接夾擊名曰十字火謂兩礮交會成  
十字形一臺後不宜背山以免敵彈反擊一臺上不宜  
多人以免多傷搖窳一臺上礮堂不宜寬以防炸彈墜

落一臺後宜有回擊小礮以防敵襲一臺旁登岸處宜作濠隄伏連響快礮快槍以防敵人舢板登岸一臺成後以礮轟試壞則更造粵省各臺限於地勢財力勢難概行改作惟有酌量修補英廠新出地藏礮一種坎地爲臺上施鐵蓋適與地平人伏地中其礮以水機升降用意似頗精密沿海無山阜者甚爲相宜擬購一尊試用至各省海口應由各疆臣自行酌辦一曰槍械粵省原擬請籌款開設槍雷各局已於五月二十五日具奏俟奉旨俞允卽擬開辦大礮擬歸閩滬鑄造前疏已經聲明至廣東省城內有機器局城西增步又有軍火局

地狹工少章程淆雜以經費無出器具未備僅能製小  
鋼礮開花子尋常洋火藥白藥水雷殼洋火箭修理船  
礮尋常機器除火藥火箭尙好其餘能成而不能精設  
局十有餘年僅動用銀數十萬迥非津滬閩各局之比  
現正澈底清查選員覓匠重加整頓茲擬將機器軍火  
兩局併歸城西增步一局以就水運之便且便督察統  
名爲製造局仍製槍礮彈火藥等物其修理魚雷學製  
淺水兵輪者歸黃埔雷局船局俟籌有經費即可逐漸  
擴充大要欲成水師必宜合力造船分地治兵專責以  
別綱目總會以聯氣勢而水師礮臺槍械三端水陸戰

守相資爲用然水師未成之時則礮臺尤要就製械言之則槍彈與行營礮尤要蓋購槍可用數年購彈斷不能支三月一舉而購槍數千則易一舉而購礮數十則難自宜分條並舉循序程功期以一年半而鑄槍礮厥成兩年而礮臺備三年而水師立五年而水師大備自足以隱懾強敵靖我環瀛惟是經費甚難人才尤不易伏望朝廷破除常格多方鼓勵部臣少寬文法不事苛求其如何考察獎勵用人不拘常格之處應請敕下總理衙門查照南北洋閩省辦理章程推廣核議通行庶幾大開風氣計日成功伏讀此次聖諭閱遠精詳於安

攘大計包括無遺而事過輒忘一語洵足以抉盡近世  
痼病發聾振聵凡爲臣子者敢不竭誠籌維以副明訓  
謹就愚慮所及今日事勢物力所能行者臚陳覆奏不  
敢以空言塞責伏祈聖鑒敕議施行

旨據奏籌辦水師事宜不無可採惟該督擬以洋藥稅  
釐作爲經費此事各國能否一律商允尙無把握前經  
欽奉懿旨先從北洋精練水師一支此外分年興辦該  
督所奏各節著交海軍衙門隨時察度情形俟餉項有  
著次第推廣辦理該衙門知道欽此

勸令僑商捐貲購造護商兵船片

光緒十一年九月初四日



再外洋各埠華商甚多如新嘉坡新舊金山河內海防  
西貢暹羅橫濱秘魯以及檳榔嶼檀香山等處大埠六  
七小埠十餘華民約在百萬以外粵人最多閩次之浙  
又次之祇以僑居異土每受洋人欺凌羣情憤鬱延頸  
喁喁仰冀國威遠加覆庇若勸令各埠捐貲購造護商  
兵船必所樂從外洋賦斂最重每一人身稅或歲徵十  
元八元多者至四五十元今爲華民謀自衛之方除大  
商願輸巨貲者不計外假如人捐二元亦可得百數十  
萬兩約可造快船五六艘船成後分赴各埠周巡護商  
儼以船數不敷未能一埠二船則每埠一年內閒駐數

月時來時往議定有事時各埠之船調集相助其養船之費卽由各埠捐抽此船應另設外洋海軍統領一員各埠距粵洋較近擬卽歸粵省調度一旦中國海面有事亦可酌調駛至南洋一帶以助聲勢從此皇威遠播海外商民咸蒙乂安之福似於中外大局不無裨益查出使大臣張蔭桓籍隸粵東熟習中外情形擬請敕下該大臣體察外埠商情如此事可行卽令妥籌辦法責成該大臣選擇廉潔明幹之員分赴各埠會同領事紳董善爲勸諭不得抑勒先與各埠商定船式俟捐有成數陸續匯寄英德船廠及早興工一面隨時分批奏請

優給獎敘仍加廣原籍學額中額各埠華商必有神祠  
書院公所之類如能捐輸巨款可否每埠各賞給御書  
匾額一方懸於公所既足以示好義之殊榮尤足以昭  
聲教之無外核計近年以來外洋華民捐助賑款防餉  
者爲數已不爲少臣采訪外埠輿情僉謂此舉若有旨  
敕辦並派欽使勸諭經收必可踴躍其養船經費各埠  
輪調章程應令張蔭桓與出使英法美日本各大臣會  
商奏明辦理似亦徠遠馭外之一助也  
旨另有旨欽此

籌辦廉瓊礮臺捐

光緒十一年九月初四日

竊惟廣東省防經年以來粗有端緒至廉瓊兩口則以  
限於事力惟恃屯軍列壘以備陸戰北海於今正新築  
兩臺而巨礮闕如查瓊州近距海防一日可達孤危固  
不待言廉州至廣西南甯止四日程若敵由廉襲邕則  
南斷龍州之後路北據梧江之上游西絕百色之運道  
一路有失而廣桂滇三省皆病去臘今正法人卽有此  
謀西電言之鑿鑿兵輪絡繹封口兩月開礮數次幸方  
恭援臺之軍自汕東還陳榮輝規越之軍自瓊北渡我  
軍旣盛得以形勢相持敵人不敢遽動諒山旣捷廉危  
始解今海氛雖平越防日逼而要害所在彼此共知此

次法人受創於粵他日如法人生事必自廉瓊始不乘此時築堅臺練巨礮終爲兩廣肘腋之憂故往日則瓊最急今日則廉尤重查廉州北海關以東沿海平行惟冠頭嶺馬鞍山電白寮三處略有岡阜可築數臺臺後可築護臺數壘口門內可伏魚雷水雷欽州水路則龍門口陸路則那梭墟皆宜量設礮壘瓊州則府東北八十里濱海有嶺曰木欄頭下臨銅羅羅斗兩沙礁多水曲扼香港越南往來之路必應築臺據險海口舊臺無用海口關以西曰西場曰金牛嶺前有竹林後有陂陀可以築臺劄營沿港可築礮隄港內可用雷艇大率廉

瓊兩口宜各築堅臺十餘座配克虜伯大礮十餘尊其餘各隄壘輔以克虜伯中小礮二三十尊田雞礮數十尊港內伏雷艇數艘水雷多具然後戰守有資約計築臺壘購礮雷共需銀八十餘萬無從籌備因思臣之洞前次奏請開辦快槍槍彈行營礮等廠擬動奏准各省關認還之氣礮洋款百萬未奉覆旨竊念要需難緩鉅款難籌擬請將廉瓊礮臺暨開辦槍廠兩案均於此項內分撥動支以便一面訂礮一面勘地築臺計礮到必須一年臺成亦須經歲而購機募匠建廠各項亦不能一時全付有此現款即可兩端並舉勻挪應用以後再

當陸續分籌踵而成之免致延誤歲月至廣西龍州關內應築礮臺前於六月十九日經臣之洞會同西撫臣等奏准動支籌備鮑餉餘款十萬查鮑餉本係奏明由各省關認還今擬將桂防礮臺十萬兩併歸氣礮存款下支用毋庸各省關認還惟粵省應還洋款已有五百萬併息約三百萬十年方能還清未清之前力難加認此款合無仰懇天恩俯念粵洋爲海疆各省之屏蔽廉瓊爲兩廣水陸之首衝且在今日情形尤爲喫重至於南關前敵更不待言此項洋款二十五萬鎊約銀九十八萬餘兩敕部暫派各省各關代粵墊還粵省邀免併

派俟十年後粵省借款還清卽將此款本息分作三年  
勻還各省祇以藉紓喘息並非終累鄰疆揆之情理似  
非過當且桂防十萬亦請由東省認還是粵省但圖騰  
展於目前而甘任艱難於日後部臣明於會計各省疆  
臣共矢公忠粵之竭力籌維當可共諒若部議必欲責  
之於粵并此通力合作周轉一時之計而亦不能行則  
此項洋款無從措還謹當存儲聽候部撥所有廉瓊破  
臺暨槍廠諸事勢必延緩以後本省能否籌畫實未可  
知獨是牖戶綢繆不宜再緩此時若因無力而束手將  
來必致臨事而蒼黃事關全局伏望宸斷施行大局幸



甚

旨戶部速議具奏欽此

購配克虜伯礮解交畿輔各軍摺

光緒十一年九月初四日

竊查上年冬間南北洋時有警報臣於十二月內訪得上海泰來洋行有克虜伯八生特車礮九十三尊車架子彈全備價值尙廉剋期可到當以此等精礮最爲北方陸戰之利器大批平價頗不易遇亟應速爲購致以備緩急隨飭委員知縣惲寶善在滬訂立合同由粵付定銀五萬兩擬請分給津軍及曹克忠張曜各營之用並懇電飭南洋暨上海道將合同驗收礮到由北餉付

價等情於二十六日電奏二十八日奉旨據張之洞電稱滬泰來行有八生車礮九十三尊各帶彈四百議定每尊一千三百四十兩已立合同由粵付定擬分給津軍等營等語著李鴻章會國荃張之洞會商辦理總以按期銀械並清勿似德國購艦事爲要等因欽此當經臣電商李鴻章會國荃飭原議委員於正月內與該行約定催令迅速解運去後其時法人雖有禁阻華械之說該行仍然依約起運於四月內將此項車礮全數運到計克虜伯八生特後膛新鋼礮九十三尊車架器具全並包鉛開花子二萬七千九百箇子母彈九千三百

箇計礮一尊配開花子母彈四百箇查外洋陣式車礮六尊爲一隊竊思若配足一百零八尊可敷十八營之用適有前飭直隸候補道盛宣懷在該行訪購前式礮十八尊身長口徑均同每尊配彈四百亦如之亦經運到就中提出十五尊合之九十三尊共得八生特車礮一百零八尊經臣派員驗明九十三礮雖購買現成之物與新造者無異其來福綫絲路完好火門不鬆鋼底門劈各件俱屬堅緻其另購十五礮亦俱全整可用其價并解津運費約十五萬兩左右除粵已墊付五萬兩外其餘十萬兩擬卽於鮑餉洋款餘存十萬兩改撥支

付應照原案由各省關認還緣此餘款十萬先經奏准  
提充廣西南關礮臺之用現經另摺奏請將此十萬併  
支氣礮存款十年後由粵認還是以此款騰出未動據  
善後海防局司道查明詳報前來臣惟近年外洋各國  
陸戰專恃礮隊北地平行無山谿之險可恃尤非有車  
礮不可現在海防弛警而近畿要地備禦不可不嚴查  
近日軍營皆知過山礮之利粵中將領聞知咸欲請領  
惟粵省平原不多祇以分撥各礮臺各陸營作爲守壘  
阻隘之用未免零拆可惜現旣配有車架不如北地車  
馳馬驟始足盡此礮之長以近日戰事驗之若以中國

宿將統礮隊十八營與西軍角逐於平原曠野之間必可制勝此項車礮擬卽委員解赴天津請李鴻章派員驗收就近分撥近畿各軍應用似於神京防衛不無裨益

旨該衙門知道欽此

恭聆懿訓瀝陳下忱摺

光緒十一年十月初九日

竊照勘界大臣鄧承修到粵臣等恭請聖安該大臣口傳八月初一日請訓時面奉 皇太后懿旨張之洞在廣東辦事認真甚肯用心汝可傳諭張之洞知之欽此跪聆之下感悚難名伏念臣才性庸駑謬承海疆重寄

時事多艱安攘並亟不過竭此血誠不自愛其心力不敢稍避嫌怨徒以迂鈍過甚或有其志而智不周或有所見而力不逮兵食宜足而要務尙多未遑官方宜澄而積習未能盡化省躬循職疚愧實多仰蒙慈訓遙頒不加譴責轉邀獎勉隆天厚地感激涕零惟有恪遵訓諭認真以祛粉飾之痼習用心以規善後之要圖以冀仰答鴻慈於萬一

旨知道了欽此

派員隨勘滇桂邊界摺

光緒十一年十月初九日

竊臣於光緒十一年八月十一日承准軍機大臣字寄

七月二十日奉上諭總理各國事務衙門奏請派大臣勘定滇粵邊界一摺據稱現接法國使臣巴特納照會近接外務部電咨已派浦理燮等六員勘定邊界於中歷十月初三日即可行抵河內等語越南北圻與兩廣雲南三省毗連其間山林川澤華離交錯未易分明此次既與法國勘定中越邊界中外之限卽自此而分凡我舊疆固應剖析詳明卽約內所云或現在之界稍有改正亦不得略涉遷就本日已降旨派周德潤前往雲南鄧承修前往廣西會同各該督撫辦理勘界事宜卽著岑毓英等各委明幹之員帶同熟悉輿地之人周歷

邊境詳加履勘繪具圖說以備考證一俟法國勘界大臣到後卽由周德潤鄧承修與岑毓英李秉衡會同勘定該大臣等務當詳細審慎按照條約持平辦理是爲至要將此由六百里諭知岑毓英張之洞張凱嵩倪文蔚並傳諭李秉衡知之欽此等因茲勘界大臣周德潤鄧承修等於八月二十四日到粵當經與該大臣等詳述邊關情形籌商一切並先經電商護西撫臣李秉衡分派將吏先行查繪草圖該大臣等於九月初旬先後啟程西行署雷瓊道王之春來省接見後卽回瓊州部署一切由瓊廉徑赴龍州相候五品卿銜主事唐景崧



因定議劉永福毋庸赴龍現亦由龍取道南甯赴滇查此次勘定中越邊界爲以後邊防樞紐關係甚鉅必須有熟諳法文繙譯通曉西法輿圖測算繪畫之人隨同前往況兩廣雲南三省沿邊將及三千里惟有分投測繪再成總圖庶可精詳且免曠日現經探聞法國派來繪圖人員甚多約計二十餘人尤應廣爲儲備惟是各省習法文者甚罕精西法輿圖者亦不多邊關瘴遠擇人殊難當經分向粵港閩滬多方采訪調集後覆加考驗分派應用計桂邊繙譯二員福建船政總監工守備李壽田六品頂戴陶瑟瓚測算繪圖十二員監生鄒璣

八品頂戴羅國瑞廣州駐防附生韓貞元八品頂戴姚  
文炳監生祝永清鄒澄貢生陳渠船政學生劉義寬監  
生孔繼榮李播榮知州顧潮都司黎中配以上各員令  
赴龍州備鄧承修李秉衡委用滇邊繙譯一員船政學  
生都司林慶昇測算繪圖四員廣東水雷局教習六品  
頂戴老穎安八品頂戴王紹衡七品頂戴王仁增原在  
龍州軍營之船政學生石紹祖該學生並可兼充繙譯  
以上各員令赴蒙自備周德潤岑毓英等委用並分向  
上海香港購置測繪儀器表尺圖籍紙筆一切器具物  
料攜帶同行兩項人員搜羅殆徧實難多得查滇邊勘

界事宜數月之內斷不能遽行舉辦因與周德潤商定俟桂界事竣再將測繪各員分撥赴滇應用並派委明習桂邊情形之同知黃寶田尹恭保直隸州知州鄧兆松知縣賴聯桂及佐雜數員供鄧承修等差委至此次分畫之疆域卽爲他日戰守之要害現接外洋電稱法國分界之員係兵部武官狄色爾海部武官布依納等竊思該國勘界多係武職意在考究形勢審探路徑用意甚深在我亦應揀派將官隨往體察查有總兵侯勉忠李寶賢副將李定勝馮紹珠黃義德參將梁振基桑儒修龍名晃都司王德標莫善積葉華泉等十一員均

係久經戰事熟習越邊情形當派隨往邊境令其周歷險要審度築臺設戍處所考究軍行出入道路藉資閱歷以備他日有事之用其西省明習員弁應另由護西撫臣李秉衡派委至東境欽越交界另行會同東撫臣倪文蔚委員先行履勘繪具草圖以備覆勘竊維勘界之舉於兵情商路兼有關係或剖析舊疆或更正現界該大臣等自能欽遵諭旨按照條約持平辦理不涉遷就臣如有所見謹當隨時會商在事諸臣竭力籌辦斷不敢略涉遷就以仰副 聖主慎固封守之至意旨知道了欽此

派員先勘欽越交界片

光緒十一年十月初九日

再臣等欽奉寄諭越南北圻與兩廣雲南三省毗連其間山林川澤華離交錯未易分明此次既與法國勘定中越邊界中外之限卽自此而分凡我舊疆固應剖析詳明卽約內所云或現在之界稍有改正亦不得略涉遷就本日已降旨派周德潤前往雲南鄧承修前往廣西會同各該督撫辦理勘界事宜卽著岑毓英等各委明幹之員帶同熟悉輿地之人周歷邊境詳加履勘繪具圖說以備考證等因欽此查兩廣界越之處延袤二千餘里自必先從桂邊開辦所有東省欽州越南交界

處所正宜先期查勘明晰繪具草圖以備勘界大臣覆勘較爲省便當經飭委通判劉保林直隸州州判張炳麟並由督辦欽廉防務提督馮子材揀派熟習將弁署廉州府知府李璣署欽州知州余鑑海派委熟習員紳偕同該委員等詳加履勘繪圖附說以備覆覈旨知道了欽此

密陳滇桂勘界機宜片

光緒十一年十月初九日

再越圻西路興化以上自劉永福移軍入關其故地卽爲游勇所踞部黨甚盛越官越民和之河窄地險以逸待勞聞九月內法兵屢次上攻俱未獲勝至今未過興

化至東路諒山所屬暨高平太原北寧等處游勇與越團亦復麇聚自四月間法兵爲黃廷經阮氏兩枝所敗以後法兵未與接仗揆此情形一年之內法人斷不能遽定越亂滇界固不能遽達桂界亦難一律暢通法領事師克勤在粵晤鄧承修曾有或先辦桂界之語查新約邊界設關收稅之處應在諒山以北考鎮南關至諒山四十里出關至文淵十里亦稱八里文淵至驅驢三十里驅驢與諒山僅隔一河驅驢在河北諒山在河南此次桂越分界設關之處竊以爲必須力爭以文淵州爲限該處大山分峙其山頭安礮飛彈可擊至南關內

之關前隘若就鎮南關設稅關通商則法亦於此設領  
事中外之險法與我共將來實無防遏之策惟發議之  
始尤宜先爭驅驢與約內諒山以北之語無礙驅驢不  
得再議文淵如此或可就範稅司務赫政過粵時問臣  
之意臣卽告以止能讓出諒山總在文淵以外此節已  
與鄧承修李秉衡籌商應俟臨時竭力辦理儻稅關分  
界可在文淵並應議定法人不得於此築礮臺謹附片  
密陳伏祈聖鑒

旨知道了欽此

酌留湘軍摺

光緒十一年十月初九日



竊臣等准兵部尙書臣彭玉麟咨以粵省防務解嚴奏請將湘軍裁撤昨閱邸鈔奉上諭彭玉麟著賞假三月回籍安心調理毋庸開缺並毋庸開巡閱長江水師差使餘著照所議辦理等因欽此查彭玉麟自前年冬來粵辦防由湖南江蘇等省調來湘軍八營長江親兵二百名到粵添募湘軍六營以道員王之春毅字兩營防瓊州以提督婁雲慶五營防虎門外迤東之沙角以提督王永章四營防虎門外迤西之大角蒲洲是爲省防中路最近外之海口以提督陶定昇三營防五門沙路兩河交匯之南石頭彭玉麟親駐其地督之是爲省防

西路最近內之衝要沙角大角山上礮臺皆湘軍新築  
南石頭海心岡礮臺則就舊臺修葺分配巨礮教習操  
練嗣後省防益急因又於沙角大角蒲州等處增臺益  
礮並由粵省續募湘軍六營共計新舊調募湘軍二十  
營零二百名於是虎門橫檔之粵軍長洲沙路魚珠中  
流沙之淮粵各軍得以聯絡犄角省防始固以上防所  
辦法疊經臣等奏明在案此次彭玉麟奏請盡罷湘軍  
自係因陳請撤防回籍不能不將所部全軍一併請撤  
以清界限惟查沙角大角爲外衝南石頭爲內衝皆爲  
必不可不守之地近以力籌節餉將本省防營疊次大

加裁減共裁去一百餘營由粵續募湘軍亦經撤遣所  
留甚爲緊迫大卒皆量其所守礮臺地勢酌留屯戍卒  
以一營而守數臺僅敷守臺操礮看護營壘之用無可  
減少亦無可移動其提督方耀鄭紹忠署廣州協副將  
總兵鄧安邦所部因該提鎮等旣係本轄又皆土勇與  
各地方相習略分其半以分駐東西北三江諸郡縣河  
道巡緝匪盜頗形不敷目前尙未據報裁竣若湘軍全  
撤窒礙殊多無營填紮臺空礮息外戶弛備他族生心  
一也勉撥數人僅同看役必至礮閒而不放臺荒而不  
修數月之後各礮器具闕失鏽澀卽成廢物鉅萬購求

之利器兩年締造之工程坐視委棄二也若另募新營  
無從籌餉三也即使有新營可補或有事再謀屯紮而  
將士生疎猝難熟練礮性明習地形另起爐竈費多益  
少四也至於瓊州孤島外海內黎現存鎮道三營實不  
敷防峒黎緝海盜之用若再將郡治勇營掣動則海防  
未免空虛所有築臺練礮等事更無可用之軍當經與  
彭玉麟籌商惟有酌留湘軍八營沙角地段最廣縣延  
七里大礮臺十六座小礮土臺不與留慶字三營守之  
以提督熊鐵生統帶大角蒲洲兼包兩山大礮臺七座  
留定字兩營守之南石頭兩岸暨水心大礮臺四座海

心岡土礮臺一座留定字一營分守之均以提督陶定昇統帶令該提督駐大角瓊州留毅字兩營仍歸王之春統帶統由粵省督撫調遣所需月餉除由江蘇湖南長江撥解者停止勿庸再解外前經戶部撥定廣東釐金項下東北邊防經費八萬兩粵海關六成洋稅項下東北邊防經費十二萬兩應請留爲防粵湘軍入營專餉至戶部於上年續撥廣東實官捐輸銀十萬爲彭玉麟一軍專餉粵省捐務大疲所收微渺殊難指用除釐金海關兩項湘餉二十萬兩外不敷尙多應仍遵照部議於捐輸項下動支如捐數不足應由粵省另行籌濟

此八營營制餉章均經與彭玉麟商定一切悉照湘軍舊制不得稍有更改竊惟從前粵省防務以事緩餉絀不過略事補苴其緊要隘口外蔽旁衝並無專營防守虎門尙不能顧及何論虎門以外瓊海之遙自彭玉麟率湘軍來粵後始創扼守沙角大角之議氣勢雄闊軍容嚴整終日築臺按期演礮各國洋輪出入望之皆爲肅然又復近扼南石遠鎮瓊島上年法船屢次窺伺聲言內犯均未敢逞未必非防營整密之效臣等所以敢於將本省防軍頓裁大半實係因與彭玉麟籌定預計地段留此八營爲汰弱留強之計且臺爲該軍所修礮

爲該軍所練愛惜培護習險設備自當遠勝他軍恭釋  
疊次諭旨現雖法人就款安不忘危孜孜以練軍造船  
洋防邊防爲最復經臣等奏請於廉欽瓊等處籌款購  
礮築臺爲牖戶綢繆之計從前未經設守之處尙思補  
其罅漏以防未然況已練之軍已設之險且係形勢必  
爭之處一旦去之實爲可惜合無仰懇天恩俯念粵防  
緊要已練勁軍難撤本省餉力難支准將湘軍入營仍  
留省瓊駐守就原撥餉項開支實於海防大局關繫殊  
非淺鮮不勝感悚待命之至  
旨著照所請該部知道欽此

欽越邊界亟應改正摺

光緒十一年十二月初一日

竊惟廣東欽州一境東南濱海西北負山有如昔時羅貼浪思勒羅浮河洲漸凜古森八峒地向係隸屬中華與廣西及越南犬牙相錯如昔時羅貼浪三峒密邇內地與越境尙少膠葛思勒羅浮河洲漸凜古森五峒地則自宋明以後不設關卡半爲安南侵蝕遠非從前舊址以致華夷參錯險要全失殊乖固圉保疆之道從前越爲屬藩中外界限尙可稍爲渾涵今該國歸法人保護此時勘界一歸越壤其土地卽淪爲異域其人民卽棄爲侏儻近聽邊民呼籲之聲遠攷歷朝沿革之故不



得不爲 聖主漚陳之查欽越接界地方先經臣等派  
通判劉保林等又經督辦欽廉防務前廣西提督馮子  
材派都司陶烈武等先後帶同熟悉邊界土民詳加履  
勘以備將來勘界時辯論茲據該員等勘畢各呈界圖  
並五峒紳耆廩貢生王永儒等六十人公稟聲稱自廣  
西思陵土州南境外沿十萬山而南其處名三不要地  
舊志謂廣東不要廣西不要安南不要古之甌脫是也  
自此沿丈二河東南行經河東之峒中永安雁慕新安  
州潭下河檜河西之舊街直抵海口兩岸崇山峻嶺有  
險可守居民約數萬皆華人查係前朝古界因越爲屬

國不甚拘限地由民間自墾就近納稅越官仍赴欽州  
考試在庠序者甚多廬墓皆在其中懇勿棄之異域並  
云分茅嶺卽銅柱分界處今名坑謝在上思州屬北崙  
汎外相距約五日程又云據欽州志明宣德間黃金廣  
等以五峒九十九村外附交址林希元請還四峒而羅  
浮峒未還以致江平黃竹各村墟混入越界故欽州素  
有八峒之名今缺其一又據署欽州知州余鑑海稟稱  
嘉道以前五峒地曠人稀耕鑿不及之區任越墾闢始  
於江平設萬甯州續於芒街設海甯府而移萬甯於河  
檳潭河以上改立新安州華民十居其九其間紳商多

欲內附若趁勘界之便將新安海甯一帶收回內地則中越以海爲界有險可憑又據調署廉州府知府李璣稟稱考府志欽州各峒黃姓世鎮其地宋爲峒主明罷爲峒長分茅嶺在州西南三百六十里卽古森峒地有漢將軍馬援唐節度使馬總所立銅柱爲中國交趾分界處三不要地亦在古森峒爲水土極惡之區又荒僻險遠難以統轄雍正六年督撫會疏請歸欽州就近撫綏故北有北崙汛東有白雞汛設兵戍守各等情竊查廣西上思下思思陵三州沿邊以外有崎嶇荒僻地數百里東爲廣東欽州西爲越南諒山廣安南濱大海有

快子籠亞婁灣九頭山青梅頭諸島嶼北界北崙扶隆  
愛簞等隘而十萬大山盤互其中其地總名古森峒亦  
稱三不要地最高之山曰分茅嶺嶺有銅柱實爲歷朝  
中華邊徼之地遠憑銅柱近據方志有歸欽州撫綏之  
案有入欽州學籍之人歷來峒主峒長本係華人此時  
土著民居皆非異族而又形勢在所必爭邊氓急於內  
附按照條約亟應改正自宜畫歸華界上游緊接廣西  
三峒思陵土州之地下游直出新安州海口東包青梅  
頭海甯府芒街接連竹山江平白龍尾一帶以正封域  
該處山僻瘠壤彼當不復措意惟芒街卽海甯府濱海

形勢尤要法國設有教堂與欽州東興汎僅隔一小河  
冬令卽涸又江平近接防城墟又在東興之後去州城  
僅百餘里均屬華離要害之地不能不與力爭應請旨  
電飭勘界大臣鄧承修與法使勘辦辯論庶邊氓不至  
終淪異域而於設防固圉實大有裨益

旨張之洞等奏欽州與越南接壤地界應照志乘所載  
及時改正等語該處地圖已由該督咨送著鄧承修李  
秉衡於桂界議定後酌量情形妥慎辦理欽此

請定盜案就地正法章程摺

光緒十一年十二月初一日

竊照粵東山海交錯民情獷悍盜匪之熾甲於他省朔

查同治二年間前督臣毛鴻賓奏奉上諭嗣後廣東省除廣州府及佛岡同知拏獲逆匪盜犯仍行解省勘審外其距省較遠之各府廳州縣所獲拜會從匪拒敵官兵及迭次行劫夥眾持械拒捕傷人罪應斬梟斬決各犯由各該州縣審實後卽解送該管道府覆審錄供具詳該督撫核明情節確實卽行飭令就地正法一俟軍務完竣盜匪斂迹卽行奏明仍照舊章辦理此外尋常命盜案件著仍照例解勘等因欽此歷經遵照辦理嗣於光緒八年四月刑部議覆御史陳啟泰等條奏內稱嗣後除土匪馬賊會匪游勇案情重大並形同叛逆之

犯均准就地正法其餘尋常盜案予限一年規復舊制  
儻實係距省寫遠均照秋審事例解送該管巡道訊明  
由督撫分別題奏不准援就地正法章程等因奏准咨  
行到粵復經前督撫臣議奏嗣後除實係土匪馬賊會  
匪游勇案情重大並形同叛逆之犯及原例內罪應斬  
梟者仍由該州縣體察情形隨時稟請就地正法按三  
箇月彙奏一次其餘尋常斬決盜犯自光緒九年五月  
初八日爲始規復舊制高雷廉瓊潮韶六府嘉應南雄  
二直隸州解道覆勘移司核詳題奏免其解省不准先  
行正法經部議覆准咨行飭遵在案然自此次省章既

行以後盜案日多近年海防多事以來各路投營遣撤之游勇紛至沓來往往勾結土匪打單嚇財入村攔路刦掠慘殺加以各處積匪結黨拜會受雇助鬪肆搶勒贖此外洋犯鹽梟縱橫出沒時而在洋伺刦時而登陸剽掠一經兜拏輒卽連檣結陣放礮抗拒形同叛逆本年以來已經多起其內地之東西北三江均爲盜匪之藪往來舟楫以及各處渡船動輒被刦陸捕則駛艇而逃水緝則登岸而逸臣等接閱各屬稟報刦案以及另行訪聞查出盜案日凡數起無一非執持洋槍火礮糾夥多人其事主懼禍未經呈報者不知凡幾雖疊經懲



做該管嚴飭勒拏並將情重著匪批行正法以期稍知  
儆懼無如營汛疲懦有司拘牽實情不盡稟聞真盜或  
致狡脫以致水陸盜案有增無減省垣附近屢有白晝  
行劫近日英國貴翰商輪亦有在洋面被盜匪刦殺船  
主之事商民悚息伏莽日深是目前粵省土匪會匪游  
勇鹽梟門匪洋盜七種合而爲一若再因循拘泥必致  
釀爲亂階臣等職在地方覩此情形實深焦慮查光緒  
八年部章曾經指明土匪馬賊會匪游勇案情重大並  
形同叛逆之犯均准就地正法所謂案情重大四字包  
括甚多原未嘗稍形寬縱卽粵省奏定章程亦係聲明

上項土匪各犯及原例罪應斬梟者均准就地正法乃各州縣狃於積習不問案情輕重藉口已復舊章不肯從嚴稟辦經年以來文告諄諄拘執罔聽除南番兩縣外罕有稟報拏獲游勇士匪嚴辦之事是以匪徒益無忌憚恣意橫行查就地正法章程原屬辟以止辟部章所謂案情重大自係由地方官酌核情節近來各直省辦理持械夥劫凶暴熾著之案皆係不分首從一律先行就地正法梟示矧粵省盜匪無一案非糾夥無一盜不持械所持之械無非洋槍洋礮及獲械訊供無一犯非迭劫多次且忽海忽陸忽土忽客忽自行糾劫忽助

門逞兇又與會土械鬥各匪洋盜鹽梟互相出入其情節實與尋常盜賊迥異卽如內河外海各盜駕船列礮大夥橫行刦殺拒捕如廣東艇匪一項較之北省馬賊騎止一人一槍尤爲兇悍實爲土匪之尤若拘泥本省章程凡斬決盜犯情節雖重舊例無斬梟明文者動須解勘題覆輾轉稽延不足示儆甚至狡翻誣攀刦逃越獄隱患不可勝言至此等盜匪多有此案附夥而彼案糾邀此案行兇而彼案接應其慙不畏法之心同惡相濟之罪實屬無分軒輊若過爲文法所拘必致意存避就倖脫稽誅此非因時立制實不足以安善良而

遏亂萌臣等督同臬司廣州府等體察地方情形悉心核議應請嗣後拏獲持械夥劫兇暴眾著之各項盜匪無論水陸不分首從凡有案情重大罪干斬梟斬決者一體照土匪馬賊會匪游勇章程先行懲辦其距省較遠者由該廳州縣審實後酌核道路遠近如有道府同城者解由該管巡道督府覆審不同城者卽分別解由最近之該管或道或府州覆審如犯多路遠者卽由道府州親赴所屬覆審均錄供通稟督撫核明情節確實批飭就地正法案情重大者仍傳首犯事地方懸桿示眾其廣州府屬及佛岡赤溪二直隸同知所獲盜匪仍

於審實後錄供解府審明通稟批交臬司會同營務處  
司道覆訊明確稟候核飭就地正法案情重大者臬示  
曉示民間拒捕者格殺勿論并將通省此項正法盜匪  
按三箇月彙奏一次逐案補具供看由府送司詳咨一  
俟盜風止息卽照舊例辦理州縣營汛諱盜縱匪者查  
出從嚴參辦據署按察使瑞璋詳請具奏前來臣等詳  
加覆核不敢拘泥以殃民惟有嚴法以弭亂考諸文武  
軍民人等衆論僉同謹合詞繕摺奏陳伏祈聖鑒敕部  
速議施行

旨刑部速議具奏欽此

張文襄公全集卷十三終

新城王樹桂校

張文襄公全集卷十四

奏議十四

爲沈鎔經請卹摺

光緒十一年十二月初一日

竊已故廣東布政使沈鎔經於本年一月十九日因病出缺業經臣之洞等奏報在案查該藩司由進士卽用知縣分發江西歷任長甯上饒新建貴溪等縣潔已愛民息訟治盜興學養士所在皆有循聲上饒有九龍山爲齋匪窟穴以計訪擒其渠魁亂萌始息嗣選授安徽太平府知府郡無城郭該司濬壕置柵盜賊屏息調安慶府時值皖北水災殫心拯濟以工代賑盛暑奔馳烈



日中董卒撫輯全活無算居官守正不畏強禦臣玉麟  
巡江過皖備悉其詳心甚敬之洊升安廬鳳道光緒九  
年擢授廣東按察使粵民勁悍健訟械鬪命盜重案最  
多莠民恃洋人爲護符豪族以良懦爲魚肉該司明慎  
公勤一介不取抵任以後清釐積案數百起詳結京控  
要案十餘起用法皆得其平尤以廉正風厲僚屬力遏  
奔競遇事守經而體察眾情通達政體處人和遜而不  
爲苟同其所施設輿論翕然十年春間兼署兩廣運司  
粵鹽積年疲銷課餉甚窘該司任事數月釐剔奸蠹設  
法疏銷除正額照解外復帶完價款銀七萬兩籌捐海

防經費銀二十二萬兩餉銀賴以挹潤五月後法事愈棘粵防戒嚴沿海各口營屯林立軍書旁午該司總理營務處係其專責凡調和將士肅清內奸經營臺壘舉辦團練無不竭盡心力區畫得宜臣等深資其助時方議發大軍進規越南援助滇桂計畫已定而苦於饋餉無出本省財力已竭兼須援濟臺閩藩司困於持籌不能兼顧該司遂兼任籌規越之餉百計羅掘懋誠勸諭紳富捐集鉅款出關之軍乃得成行歲暮寇急出巡各營申儆戒備除夕駐守海壩與將卒共勞苦而司中公事仍復親自經理不少休息本年四月調任粵藩六月

接篆防務甫解撤留省內省外關內關外各營數至四萬餘人移屯併戍給資清餉費益浩繁散勇雲布時西北兩江大水爲災人心惶惶深慮擾動該司籌款資賑復派員弁分途押送均各帖然回籍一面籌措鉅款議修廣肇兩府圍堤考核圖經規畫工料現已籌度略定該司以粵省吏治久敝亟思激揚而廓清之自受藩篆以來嚴立章程銓品人才孜孜如恐不及數月以來屬吏欣欣皆有爭自濯磨之意八月以後洋款屆期京協各款待解尤急司庫搜括殆盡該司焦思籌畫嚴稽出納力杜浮冒鉤校簿書夜分不息自夏間積受暑濕重

以勞瘁過甚中氣耗損致患風痺危證濕瘡徧體雖在  
假中仍力疾伏牀手治官書與臣等函商兵食要政使  
牘往來日猶數起調理稍愈卽勉出治事十月十六日  
委赴波羅廟致祭南海神因令就近察閱牛山新築礮  
臺工程形勢勞頓不支十八日還省頓發前病適作函  
稟陳公事發函擲筆倒枕困伏氣息頓微風痰驟湧遂  
以不起歿之日布被蕭然一如寒素僚屬無不同聲痛  
悼竊維粵省物博民龐事變日多而習氣日靡吏事兵  
事餉事無一不費整理若該司之才識操守久爲粵省  
官民信服使之久任必能轉移風俗整飭官常本年五

月奉旨令保奏籌濟滇桂各員已擬將該司首列刻章  
一旦因病出缺臣等失指臂之助尤不能不爲國家惜  
此人也合無仰懇天恩垂念該司盡瘁防務遭疾殞生  
飭部照藩司軍營立功後積勞病故例從優議卹並將  
生平政績查付史館列入循吏傳以爲以死勤事者勸  
出自逾格鴻慈不勝感悚待命之至

旨沈鎔經生平政績著准其宣付史館列入循吏傳所  
請議卹之處著毋庸議欽此

請開缺回籍調理摺

光緒十一年十二月十八日

竊臣幽冀下士學術迂疎以編修積資十有七年薦陞

坊局孤根薄植獨被特達之知朝廷軫念時艱廣開言路應詔竭慮屢有敷陳不加譴訶轉邀遷擢復以疏論邊事奉旨命赴總署遇事諮商旋蒙不次殊恩由內閣學士授任晉撫上年四月奉召入覲遽聞督粵之命其時惶悚踖蹢莫可名言祇以海防喫緊宵旰焦勞欲受任則力不勝欲固辭則義不敢當於四月二十九日謝恩摺內曾將才智精力皆不勝任據實陳明在案陛辭之日復經披瀝上陳旋卽乘輪泛海星馳赴粵甫到省門海警已迫當與尙書臣彭玉麟前督臣張樹聲撫臣倪文蔚等併日趕辦酷暑蒸灼不容喘息粵省當八面

受敵之區又須兵食並籌東西兼顧內防外援無一不難無一不急臣竭其心思夜以繼日而吏弊盜源復不能不竭力補救自到任以至解嚴夜寐不過數刻罕有解帶安息之事粵中賓客之多各省所無接晤同僚將吏他省委員每自平旦至於日暮甚至夜分未已今年以來飲食日少精力日減言語稍多卽覺舌本枯強蹇澀五月猝值水災臣方患瘡證困頓牀蓐痛楚萬狀仍力疾自作函牘延客臥內日與僚屬籌措賑務秋間卽擬具疏乞罷以西省邊防未定界務未舉東省裁營留戍餉款隄工正在糾紛棘手之際未敢上陳近來病勢

益深加以喘嗽氣逆用心稍久卽發怔忡據醫者云由於心血過傷肝脾俱病惟有靜養調理非藥餌所能速效竊思粵事雖漸有端緒而兩省邊防海防各善後事關久大籌畫艱難必須蓄艾卧薪始克有濟若事過輒忘敷衍目下必致貽悔將來近日政務繁難仍未稍減斷非孱病之軀所能勝任惟有仰懇天恩俯准微臣開缺回籍調理俾得從容醫治另簡廉公閎毅之大臣來粵接任以免貽誤臣年未五十儻蒙福佑漸臻痊復惟當葆性攝生讀書學道俾識力稍有增益或可爲將來報國之資不勝感悚屏營之至歷次奉旨飭查飭議要



件略已就緒另疏上陳目前緊要事務臣仍當力疾辦理謹恭摺具奏伏祈聖鑒

旨著賞假一月毋庸開缺欽此

查辦匪鄉摺

光緒十一年十二月二十七日

竊維廣東莠民爲害地方者約有三類一曰盜劫一曰拜會一曰械鬪盜以搶掠會以糾黨鬪以焚殺三者互相出入統名曰匪會多則爲盜盜強則助鬪鬪久則招募會盜各匪皆入其中習俗相沿蘖芽日盛擾害農商撓亂法紀盜以廣州府屬沿海各縣肇慶韶州兩府沿江各縣及廉州瓊州兩府洋面爲最多會以惠州府屬

及毗連香港之九龍司等處爲最多高廉所屬亦漸蔓衍闢以惠潮廣三府爲最多廉瓊次之廣惠潮匪徒則以香港澳門爲窟穴廉瓊匪徒則以越南爲逃藪溯查同治以前潮州府屬最號難治焚殺相尋田地荒蕪商旅裹足錢糧抗完民不畏官幾同化外經前督臣瑞麟於同治七年奏派署潮州鎮總兵方耀帶兵勦辦周厯匪鄉清理積案先後拏獲首要匪犯一千一百餘名盡法懲治民情大懽近十餘年來潮屬遂爲安土嗣後同治十年有查辦韶州翁源等縣土匪廣州東莞劫擄械鬪之案同治十二年有勦捕東西兩省交界高廉等處

伏莽之案光緒三年有查辦惠州匪鄉之案無不懾以兵威勒交匪犯礮械一時稍爲斂跡終以未經大加懲創撤營之後其結盟拜會劫闖報復如故比年以來沿海辦防未及清理內地高州之電白惠州之稔山於光緒八年十年先後滋事雖經勦辦未絕根株兼以游勇海盜鹽梟會匪暴鄉悍族互相勾煽助勢黨類益衆仇殺益多礮火攻擊動連一二十鄉村鎮劫掠月至二三十起其大姓恃強凌弱豪匪抗官視爲常事非文告所能禁非縣汎所能理若不趁此防務已定軍事稍暇之時由統兵大員酌帶營勇前往歷來滋事地方督同該

管文武剖分良莠詳查釁由示以軍威勒交匪械如敢  
抗庇卽行圍捕痛懲積惡重治窩家申嚴條約鈐束化  
導則將來禍患誠恐未已臣等維安良除莠古有明箴  
欲爲杜遏亂萌之謀必先行辟以止辟之政迭經督辦  
欽廉防務前廣西提督馮子材署水師提督方耀署陸  
路提督鄭紹忠電函往復屢次面商均以爲此時必應  
辦之事未可養癰遺患以致燎原難滅現擬將粵省各  
州縣著名匪鄉澈底查辦會匪盜匪鬪匪一體清釐以  
惠潮爲一路廣州爲一路廉州爲一路惠州海豐陸豐  
兩縣悍鄉最多匪徒最衆從前豎旗倡亂已非一次近

曰情形兇橫曰甚此處應先行舉辦擬以方耀專辦該處鄰近水師所轄者附焉其餘惠潮所屬各縣屬陸路提督所轄者則會同鄭紹忠辦理以鄭紹忠專辦廣州屬番禺東莞香山新會新甯清遠花縣佛岡等處督同署廣州協副將鄧安邦辦理韶州肇慶兩府界連廣屬者亦附焉其近海匪鄉則以方耀會同辦理以馮子材專辦欽廉等處其洋面盜匪及九頭山匪巢則飭陽江鎮總兵黃廷彪統帶兵輪暨該管水師巡艇協同馮子材之軍勦捕至於訊供定罪究以前之案情立以後之約法必須道府大員會同妥辦惠州卽委署惠潮嘉道

益齡廣州卽委署督糧道李蕊廉州卽委署廉州府李  
璣會同辦理責令該道府等督率委員將捕獲緝送各  
匪調核案卷研究是非其情節較重素行不法有擄殺  
糾匪實據者卽予正法餘則分別懲治保釋剪除積年  
巨憝以生其儆畏之心扶持一鄉端人並予以鈐束之  
柄略仿潮州章程設立約正約副族正族副房正房副  
責成稽查勸導給以札諭榮以頂戴匾額以後該鄉如  
有各項匪徒卽令舉首捆送令悍徒皆歸於統紀犷俗  
以漸而轉移國法彰明穢瑕滌盪庶可保全良善杜絕  
亂階馮子材勲威夙著性慈愛民以辦本地土匪自可

裕如方耀鄭紹忠歷年辦匪久著成效均能明達事理不致冤誣衆所信服臣等又諄囑馮子材等轉飭各將弁辦案與戡亂有別捕匪與禦敵不同仍當酌量重輕寬猛相濟毋得過爲操切至於劣紳豪棍保匪誣良於此舉甚爲不便其造作謠言蜚辭誣構恐所不免臣等惟有勤商辦法考究實情不以浮言而撼大局以仰副聖主綏靖海疆子惠邊氓之至意

旨著照所請該部知道欽此

請嚴定械鬪專條摺

光緒十一年十二月二十七日

竊據廣東按察使于蔭霖詳稱查粵省民情强悍每因

睚眦小怨田山細故輒卽不候官斷招雇外匪約期械鬪主鬪之人大率係其族首族紳祠長之不肖者名爲兩族兩鄉互鬪實則臨時雇募土匪鹽梟海盜及一種專習綾槍游手亡命之徒號召者或數百人或千餘人附和者或數村或數十村外洋利器隨處可購是以洋礮洋槍旗幟刀械無一不有又復高築寨牆建造礮臺有攻擊三五年而互鬪不已者有已經和息而挾恨復鬪者臨鬪之時高豎大旗對放巨礮若攻入彼村卽恣意焚殺搜搶所燒房屋動以數百間計所殺人口動以數十命計甚至掘毀墳墓擄捉男女拒殺兵差兇殘不



法無異化外且鬪勝之村動輒殘毀田禾薯蔗數百畝  
砍伐樹林果園數千株故此數村經一次械鬪卽喪失  
一二年或數十年之資產其隱害民生者尤非細微此  
等惡習惟廣州府之番禺東莞增城新甯新會惠州府  
之歸善陸豐海豐博羅長甯河源潮州府之潮陽揭陽  
爲最他郡縣亦多有之其惠州所屬近日甚至傳聞有  
設卡斷路殘食人口之事殘忍藐法各省罕有互鬪之  
村鬪散卽止每不據實具報而地方文武規避處分亦  
不免代爲隱飾習以爲常卽或馳往彈壓捕拏該匪等  
悍然不理兇鬪如故或迎拒官長不令入村或兵役無

多不敢近前必俟其鬪散然後邀致鄰近紳耆從中排  
解責令交匪繳械於是賄買頂兇任意搪塞所繳者皆  
破壞無用之械所交者皆蠢愚老疾之人不特必非爲  
首抑且並非爲從彼主謀肇衅歛錢糾衆幫鬪行兇者  
轉得逍遙法外縱使懸賞拏獲而人多鬪急槍礮如雨  
之際究竟何人下手傷人何槍何礮之傷最重亦屬無  
從質證照例懲辦罪止軍流毫無儆畏推原其故由於  
粵民聚族而處祠產素豐事無大小皆聽族首族紳祠  
長號召族首等賢否不齊主鬪者既藉勢豪兼恃財力  
取公帑以恣揮霍歛衆費以供侵漁而所雇覓之匪徒

又足以爲之羽翼但有得財之樂從無償命之苦地方官因無兵力傳首謀則不到勒凶匪則不交官法旣窮私忿益熾以故江河日下羣相效尤厯年大吏及地方官明知其弊特恐操之過急激成事端得辦理不善之咎不得不將就了結民强官弱法令不行實情不敢上聞嚴辦諸多窒礙所以積弊至於此極也查從前髮逆滋事徒以養癰成患馴至不可收拾今外患甫平內訌宜靖現奉檄行文武大員分往各縣匪鄉查明新舊各案推究致鬪之由判明曲直勒交積匪審明案據立予嚴懲各就該處情形從民所便責成鄉長族長房長層

層鈐制約束化導以後遇有匪徒生事則令稟報細送以期永靖地方惟查例載廣東省糾衆斂費約期械鬪仇殺人數雖多致斃彼造一命者主謀糾鬪之首犯發極邊足四千里充軍二命者實發雲貴兩廣極邊煙瘴充軍三命者發新疆給官兵爲奴四命以上絞立決十命以上斬立決二十命以上斬決梟示其隨從下手傷重致死應行擬抵者各依本律例擬抵傷人及未傷人者亦按各本例分別治罪又廣東械鬪案內如有將宗祠田穀賄買頂凶搆繫械鬪者於審明後除主謀買兇之犯嚴究定擬外查明該族祠產酌留祀田數十畝以

供祭費其餘田畝及所存銀錢按族支分散若族長鄉約不能指出斂財買兇之人者族長發遣鄉約杖徒各等語如下手傷重方議抵償主謀糾鬪不皆重典而爲從傷人及並未傷人之犯照爲從減等罪止滿流卽照軍器傷人亦止擬軍詳釋例文自以鄉里尋仇尙非鉅患僅言鬪則無焚擄之流毒僅言械則無槍礮之利器僅言糾衆則無梟匪海盜之叢集僅言仇殺則無抗官拒捕之重情是以下手者仍照其毆主謀者尙多差等竊惟今昔情形實多不同變通之道因時而宜重典之刑因地而用近年廣東械鬪聯村聚衆殺害無辜焚毀

搶擄抗官拒敵傷及兵差形同叛逆罪坐所由主糾者  
似無寬貸之理而爲從之犯各項匪盜畢萃其中專以  
幫鬪爲生不過殺人漁利並非本族本村與彼造風有  
不解之仇切膚之患槍礮轟擊之際殺傷之多少亦不  
能自爲限制下手之輕重更無從推究主名揆其兇悍  
情形實係真正土匪配所逃回必更報復滋害然非當  
互鬪之時派兵圍捕則眞犯決不能拏獲主謀亦無從  
追究且使此鄉尋鬪殘害彼鄉未經報復之時若早發  
官兵將肇衅之鄉認真圍捕能將首禍幫兇勒交數名  
立置重典則彼鄉冤憤旣平自不致尋仇蔓禍保全實

多伏查同治六年刑部奏定章程天津鍋匪數十人  
以上持械聚鬪殺傷搶掠就地正法拒捕者格殺勿論等  
語其所以特從重典者原爲除暴方可安良況以廣東  
鬪匪數累千百械必槍礮較之天津鍋匪僅聚數十僅  
持刀械者情節尤爲重大相應詳請奏明另立專條從  
嚴辦理寬免州縣處分責令實稟實辦以儆兇匪而遏  
亂萌等情前來臣等查粵省械鬪實爲諸匪之藪惡俗  
不革內患堪虞該司所陳係屬實在情形惟有據實瀝  
陳仰懇聖明俯念廣東械鬪日多情形兇悖數盜養匪  
實爲地方治亂所關勅部特立專條准將粵東械鬪匪

犯凡糾衆數十人以上招雇匪徒放火器殺傷人命擄  
虐男婦焚燒房屋搶毀資財之案其主謀者斂錢糾  
者受雇持械幫鬪審明素行不法兇暴顯著者無論殺  
傷幾命是否係該匪所傷均照土匪例不分首從一律  
就地正法情節重者酌加梟示向來管事之該族首族  
紳祠長於聚鬪之前數日不行出首旣鬪之後十日內  
不行交犯卽以主謀同論至鬪鄉祠產查係赴他鄉尋  
鬪及定地互鬪者除酌留香火資三十畝外盡數入官  
以爲義倉社學之用雇覓無資則亂源可止其因強鄉  
生釁尋鬪弱鄉集衆應敵因而殺傷焚擄者但科鬪罪



祠產免其入官若此鄉雖經受害不候官兵拏辦自行  
糾匪前赴他村報復殘害者不論致鬪先後一律辦理  
其未傷人放火擄生劫財及人數較少者暨他村尋鬪  
僅在本鄉自衛拒鬪致有殺傷並無殘暴情形者仍照  
舊例辦理各屬再有鬪案准其請兵圍捕務將主謀糾  
欵及幫鬪真犯拏獲究辦抗拒者立予格殺并懇格外  
天恩將從前凡有鬪案處所之地方官無論已報未報  
概免其應得處分俾免瞻顧以後州縣遇有鬪案據實  
稟報懲辦免其議處如再有諱匿粉飾致主謀鬪匪遠  
颺者一鄉肇釁尋鬪地方官不早請兵獲匪嚴辦以致

釀成互鬪巨禍者均予從重參處庶足以抑強安弱漸  
變澆風

旨該部議奏欽此

勦捕洋匪摺

光緒十一年十二月二十七日

竊查粵洋向來多盜廉瓊海面以九頭山爲巢穴省城  
六門內外海面以香港澳門爲逃藪九頭山孤懸越境  
海中巖谷荒邃匪踪麇聚伺便出劫本年十月間准督  
辦欽廉防務提督馮子材函咨欽州近海之猫尾海沙  
井茅嶺各處屢有匪徒駕艇行劫擄人勒贖且防城墟  
等村竟有登岸搶掠傷斃人命情事查係結連九頭山

盜匪勢甚猖獗疊經該處商民稟訴請撥師船前往剿辦又據署廉州府李璵署龍門協副將梁正源稟大略相同當經派委陽江鎮總兵黃廷彪統帶兵輪四艘馳往廉瓊洋面會同高州瓊州兩鎮龍門協副將陸路防勇拖扒各船併力勦辦均聽馮子材調度所需陸勇卽由馮子材所部酌撥附載各輪隨同攻勦並囑馮子材就近雇募拖船配給勇械以爲輪船輔助如匪蹤竄匿山島卽登岸搜勦如逃至沿海村鎮卽會合陸勇防營兜拏疊接馮子材等文電已於洋面連遇匪船勦擊數次除殲斃溺斃外擒獲多名解交地方官審辦至於港

澳之藏垢納汙習爲故事近在省門逃犯會匪藉爲糾約栖息之所劫盜於此窩賊私梟於此屯鹽連檣巨舸泊於洋界不能過問其間夾帶私硝私火藥違禁濟匪私土私貨闖越課釐更爲餘事任意出沒無所不有巡船若少則開礮拒敵動輒損船傷兵官輪本屬無多水師習氣尤重海面遼闊此防彼竄從前防務倥傯未能騰出船力九月間有匪黨僞稱客商搭附英國貴翰商輪行至澳門外萬山洋面突起戕害船主一名傷管輪等三人飽掠而去卽另用小艇接運遁至澳門寄賊伏匿經臣等訪聞並據英領事照會請拏現派廣西催餉

委員思恩府知府劉恩濬廣東直隸州知州曾紀渠副將黃金福統帶輪拖各船並配陸勇統巡六門內外洋面所有鹽務釐局海關輪拖各船均聽調遣以期通力合作會合水師將弁遇有海盜鹽梟各匪一律勦捕截之華界洋面待其駛來卽行攻擊並預行知照香港澳門洋官遇有追捕竄至洋界卽行協緝交出近日已拏獲數起解省現在匪蹤仍未大戢復經嚴飭各路設法合力勦捕務期大創羣醜殲擒渠魁以靖海疆而安商旅

旨覽奏已悉卽著督飭派出員弁實力勦捕以靖洋面

仍由該督等隨時妥辦約束水陸弁勇毋任別滋事端  
欽此

分撥毛瑟槍摺

光緒十一年十二月二十七日

竊查去年臺圍緊急越戰方殷內地需械急如星火港  
滬售賣已罄所存者類皆零星舊式之物經臣之洞密  
電柏林託李鳳苞設法覓購毛瑟槍二萬枝子彈一千  
萬顆包送到華分撥各省應用於九月二十六日電奏  
請敕李鴻章與李鳳苞定議嗣准總理衙門電開二十  
八日奉旨精械急須多購卽著李鴻章鄭藻如蔡國楨  
定礮李鳳苞業經交卽著電許景澄定槍先行籌款妥

速辦理等因欽此當卽欽遵轉電分別辦理嗣經李鳳苞許景澄先購到槍一萬一千枝彈五百五十萬顆併運費由戶部墊付銀二十萬九千六百五十二兩四分七釐奏明於受槍省分照數解還部庫其餘九千枝屢接許景澄函電前經遵旨如數購定不能退還一併陸續運華計續到九千枝彈四百五十萬顆並運費由粵墊付銀一十四萬六千五百七十三兩四錢八分三釐另由香港運至省城黃埔費並息銀由粵墊付銀二千五百四十五兩七分四毫總計槍二萬枝彈一千萬顆均已到粵部粵共墊付銀三十五萬八千七百七十兩

六錢四毫分計受槍一千枝彈五十萬顆應攤銀一萬七千九百三十八兩五錢三分查粵省及滇桂各軍已由臣等另行購備毛瑟等槍分別解濟此項槍彈本年春間經臣等派員運解楊岳斌行營一千枝彈五十萬顆劉銘傳行營一千枝彈五十萬顆又副將龔尙春援軍攜帶槍五百枝彈五十萬顆已另由粵省付價其二千枝應於粵省濟臺餉內扣回解部墊款銀三萬五千八百七十七兩六分又撥張曜嵩武軍槍一千枝彈五十萬顆又解滬聽李鴻章分撥槍四千枝彈二百萬顆計五千枝應由北洋解還部庫銀八萬九千六百九十



二兩六錢五分尙存槍一萬三千枝彈六百五十萬顆  
分撥未定以致部粵墊款至今尙虛懸無著竊謂中法  
接仗之初以器械不精難操勝算迨關外各軍陸續皆  
得後膛新槍遂能奮厲無前大褫敵魄可知中國無不  
可用之軍而有必當講求之械現在粵省厯經購備精  
械已屬敷用卽直東兩江閩浙籌辦洋防有年想亦不  
虞缺乏惟京畿各營正在講求訓練東三省目前急宜  
經營甘肅新疆餘氛未定此外如甘肅關外及河南陝  
西四川湖南等省防軍皆以距海遙遠尙多沿用舊槍  
後膛新械甚少若每處勻受若干枝籌價既不爲難而

利器足資要用擬將此項槍彈撥解神機營三千枝東三省三千枝新疆軍營三千枝陝西四川湖南各一千枝每千枝配彈五十萬應由戶部核定價值何處解粵俾部庫及粵省得以收回墊付之款似覺兩有神益部款關係緊要固應迅速歸還粵自辦防協鄰以來羅掘已盡此後善後籌邊各事宜及帶還洋款無一不需鉅款尤盼此項早日收還俾得稍事補苴據廣東善後軍械等局司道詳請奏咨前來臣等覆核無異相應具奏請旨如蒙俞允其京營東三省所需臣等當卽遣員解赴天津由北洋大臣點收分別轉解其新疆陝西四川

湖南河南所需應由各該省派員赴粵領運應解價款  
照案解還戶部及粵省以清懸欠

旨該衙門議奏欽此

陳明同時告病片

光緒十一年十二月二十七日

再臣因病軀不支於本月十八日專摺奏請恩准開缺  
回籍調理計已上邀宸鑒乃臣將奏稿咨行後於二十  
六日夜始接撫臣倪文蔚函稱已於初九日因舊病復  
發疏請開缺其時并未接准撫臣咨會不勝爽然查撫  
臣前以請假奏稿相示詞意似欲引退臣當即勸以休  
息旬日即可復元并告以臣自五月間病體已形委頓

秋間卽擬乞罷因粵省緊要爲難之事尙多且有應行覆奏之件數起俟諸事趕辦略清後卽當上陳撫臣精力尙好而臣病勢日深萬難久任若兩臣同時求退似有未便諄勸其萬勿引退撫臣當已應允不再續假本月初一日假滿卽出城與臣會同閱操連日屢經晤談僚屬亦無人言及是以臣疏卽行拜發初不意撫臣已先自入告也竊恐朝廷未悉其中情形以督撫同時乞病事不多見不敢不縷晰陳明目前地方一切要政仍與撫臣及司道等籌商妥辦竭力整頓不致上貽宸厪伏祈聖鑒

旨留中欽此

劉永福到粵摺

光緒十二年正月十九日

竊臣於上年七月二十六日接總署來電本日奉旨張之洞奏安置劉永福事宜一摺覽奏均悉瓊州孤懸海外選將駐兵諸宜審慎劉永福到粵後著張之洞傳見詳加察看將其性情才略究竟何如所部勇丁是否安靜守法據實電奏候旨定奪欽此伏查劉永福於上年三月以後經臣委員前赴越南館司關傳旨罷兵五月間由保勝移至滇境文山縣之南溪八月初由滇啟行入桂九月間由百色行抵南甯十二月間由南甯率部

赴廣並思欽不便屯紮各節疊經臣隨時驛奏電奏在案查南溪距保勝數十里僅隔衣帶一水經雲貴督臣岑毓英多次飭催該提督請發欠餉請帶多軍請代運送礮械請遷移家口之費請安置越眾之資久未就緒揆其大意一則以經營多年棄之可惜一則以舉部來歸意存畏疑一則以內徙處所溷便粵難是以河上徘徊仍復觀望不免專待粵省委員到後面叩情形始定東來之計直至七月底委員孫鴻勳先後到彼宣述聖恩指陳利害示以臣批檄手書各條保以來必無患許以奏獎該軍並資給賞犒服飾各物所部皆喜乃始慨

然就道其時從赴南甯者部眾強弱共三千餘人臣豫飭左江鎮劉光裕左江道彭世昌暨委員等照料彈壓並奏派主事唐景崧前往諭導一切隨經該提督分別妥爲資遣將其家屬並部下眷口送至賓州安置當初調入關之始不能不許其率眾自隨檄令准帶五營豫爲刊發福軍統領並五營營官關防以安其心嗣亦奉准帶二千人之旨及到南甯後電飭該提督推誠開諭謂人多適足爲累令減爲五底營每營二百人外親兵一百人差委將弁十員營制餉數略照楚軍章程統領公費視常格稍優大抵存五營之名以隆體貌減人數

之實以省煩擾省月餉加公費以圖持久並諭以如有  
征戰再准將五營募足手定該軍營制規條一紙發往  
該提督奉令維謹其時新約已行桂商已通甌脫之議  
尙未可必該軍將士之意遂欲留止南甯屢接護廣西  
撫臣來電力言西省邊腹皆不宜處臣前雖有請處瓊  
州之議但旣奉旨察看未便遽行擬議然不指定屯紮  
處所則軍無定向彼旣不免顧慮臣亦無從安排熟察  
情形暫時惟有徑處之廣東省城爲宜一取其在臣左  
右得所依倚其心自安臣亦可就近察其軍律才具一  
取其近隸臣標鈴轄易施且省門軍容尙盛不致或萌



驕滿一取其與粵省文武各官相習日久浹洽諸事易  
商一取其地當省會衆人屬目不致譌言附會別生枝  
節嗣於十二月二十二日率部抵省卽令該軍屯紮東  
門外十五里之龍泉岡豫爲築壘以待綜計行經兩粵  
境內水陸數千里以至登岸歸營不擾釐稅不恩街市  
出之邊外新附之勁軍尤爲難得臣接見該提督感激  
涕零自稱蒙聖朝高厚之恩誓當盡力報效捍禦邊陲  
臣慰以盡釋疑慮戒以奉法束下勉以異日勛名仍派  
赴越諭調之委員州判孫鴻勳通判陳文埤經理該軍  
營務爲之講論書史隨時規勸指示禮數通其隱情旬

月以來肅然安靜伏思該提督雄長越地根蒂已深據保勝以爲奧區連三猛十州以爲後路法人屢經遣使納賂連和令其假道罷兵決意不允自斬法國大將李咸利以後大振華風連摧凶燄事刊西報名播諸洋最爲法人所忌永福一日不去則法人一日不安故澎湖之退否專視保勝爲遲速無理要挾上勞宵旰臣仰遵詔旨深維大局始則議調繼則頻催而事多葛藤又費駕馭岑毓英不欲處之於滇李秉衡亦不欲處之於桂於是廣東不得不獨任其難檄諭函電數十次委員航海赴越深入法營由河內至館司傳旨者一次由河內

再上至興化被土寇擊回者一次由龍州取道越邊行  
荒險無人之地出開化抵南溪者一次由南甯百色亦  
出開化南溪者一次由粵送餉赴百色相待伴送同來  
者一次崎嶇瘴毒礮火艱危由越往者從人被害由桂  
往者士馬多亡人人皆病僅乃得達至於繁費無算更  
不足言幸該提督不違朝命黽勉東來燭其積聚棄其  
軍資攜其老弱盡棄故土來效馳驅一路約束秋毫無  
擾遵道遵裁悉依條教此皆兩省官民所共見共聞者  
也臣察其爲人沈靜驍鷲知恩畏法勇而有謀深明洋  
戰竅要又肯講求後門槍礮是其所長特生長邊鄙質

地甚樸聽言易受人欺吝惜財物不忘人過是其所短  
至於不識文字性情間有暴急之處乃武將常情無足  
爲異其治軍紀律在越則甚疎入關則甚整是本有治  
衆之才但視其加意與否若用之兩粵海防宿望所資  
最易見效其於他省是否能爲遷地之良則尙未可知  
惟該提督久擁羣部號令北圻越地大小各官無不承  
風聽命一旦內附情勢迥殊然於臣極爲恭謹與各官  
相接亦皆謙和如禮且安家賓州將爲求田問舍之計  
是其輸誠報效心跡顯然溯查上年岑毓英電奏曾有  
請授永福海疆一鎮之請故臣前作函電招之有云中

華一鎮遠勝南越三宣不過藉此闔職之榮堅其內附之念今既遵旨到粵合無仰懇天恩可否授以兩粵總兵一缺并請明諭仍令統帶本部駐紮省城原防訓練部勇聽候調遣如此則可勿庸前赴本任數年後體察情形再爲奏明辦理該提督益當感奮心安而亦不致以文法未嫻致干吏議似於激勸保全之道均屬相宜其部下員弁前已奉旨准由臣保獎另摺奏陳竊惟朝廷之待該提督前後恩施賞賚優渥非常而該提督先則苦戰捍邊屢破強敵今則毀室歸朝恪遵法度亦尙能不負國家臣之所以處永福者大抵嚴馭以法而寬

給以資令其常親端人代爲檢束部將惟在以後疆臣  
推誠相待善爲拊循勿以節餉爲詞而遽罷其兵勿以  
部衆細事而苛繩不已庶幾平日無嫌緩急有用則所  
以厲海內忠臣猛士之氣卽所以絕敵國妄生窺測之  
心於海防大勢不無裨益

旨劉永福已簡放南澳鎮總兵仍著統帶本部駐劄原  
防訓練部勇暫緩赴任欽此

已塞沙路永遠不宜復開摺

光緒十二年二月二十五日

竊惟因地設險立國大經粵省自辦理海防所有黃埔  
入省水路兩支分用船石橋樁兩道攔截費盡唇舌工

料不貲始克辦成南支曰沙路口門業已塞斷北支曰魚珠尙留口門十五丈以通舟楫行之年餘各國護商兵船港澳渡船照舊往來惟專行中國各口岸之洋行商輪喫水較深到黃埔後另雇他船剝運入省於通商情形毫無窒礙嗣因和局已定魚珠一支已開臣逆揣各國洋人必欲併開沙路河道若如所請從前心力勞費盡付東流以後設再有海警防務更難措手當將沙路不必開通輪船專由魚珠實於海防有益各節於上年六月二十九日附片奏明奉旨該衙門知道欽此隨於七月初四日據美國領事喜默照會有水師員希虔

慎願偕中國官勘察河道搬移阻礙等語八月初四日  
又據德國署領事穆麟德照會沙路塞斷海船只在黃  
埔上下貨物小船剝載多延時日應請撤除照舊往來  
如恐礙難則開一十五丈之闊口儻仍未便則酌派特  
權委員將尋常公事在黃埔就近辦理等語又於七月  
十九八月二十三九月初一十九等日節據英國署領  
事嘉托瑪文函均請將省河南支開通復准總理衙門  
咨據德國英國駐京公使各以前情函致總署咨粵查  
辦又據英法美德奧和瑞典等國領事照會請將南支  
開通二十丈等情經臣以沙路開通工程浩大既與商



船無甚阻礙尙須徐議酌行又以沙路開口礙難開通所請黃埔設一特權之員事隸海關俟與粵海關商辦先行照覆旋咨准粵海關監督轉據稅務司賀璧理覆稱查上年進出口輪船共一千零六十七隻內德國船九十隻不及十二分之一他國船多至十餘倍並無耽延豈有德船獨被海關耽延之說且將上年未塞時一二兩結比較本年一二兩結逐船推算耽延不及一日無至二三日者貨卸畢而單照未到者十中無一秋冬水涸船至大沙頭亦須耽延德領事所請添派委員在黃埔辦理尋常日行事件則輪船洋行必須預設分行

而駐省貨主勢不能移至黃埔於洋船仍屬無益等情  
臣又以南支水道攔塞於通商大局實無所妨不必更  
議開通照覆各國領事在案查洋船入華最大者曰公  
司輪船向來只到香港不能駛入虎門其洋貨發售存  
港者多入省者少間有來省者由渡船自港零星運寄  
次曰夾板帆船洋貨皆由載運向亦僅到黃埔不能行  
抵省城歷年通商定章至今不易其直抵省城沙面者  
則洋行所設來往香港澳門之渡輪各國之護商兵輪  
並通商口岸各洋行所設之商輪及招商局之商輪現  
在渡輪兵輪照舊抵省而各岸洋行商輪以喫水較深

未能駛入究竟此等船隻來自中國口岸亦僅上海一處其南而瓊廉北而汕頭廈門福州皆由香港發軔並不經由省城故爲數獨少且所載悉係華貨其所搭悉係華人其起剝費用出自華商華民與洋人毫無干涉而所費又復有限乃借有礙行船之利爲詞欲搖撼粵東已成之防局居心殊不可問計英美在華分行各岸洋輪尙多德國已少法國並無一輪奧和瑞丹更不足論其爲商利損益與各該國何涉何必聯幫瀆請此其注意在中華形勢海防不在該國商務尤屬顯然蓋沙路一支但能三年不開自然沙長灘多巨艦永難駛入

若專由北支一路不惟魚珠以內水淺行遲且自四沙口起須先過牛山新造礮臺再過長洲魚珠各礮臺關鍵既多防遏歸於一路全力扼此簡要易施其爲利害出入實相懸絕況沙路塞口淤沙已漸長現實亦費鉅難開竊惟通商馬頭原在黃埔咸豐季年各岸商輪擅自深入徑抵沙面不載條約斷不宜聽其妄瀆以致棄已成之鉅工縱入室之隱患上年十月內各領事復有照會詢及此事詞氣已鬆近英領事費里德來晤亦略言之臣直告曰不能彼遂默然揆此情形若能始終明言堅持彼斷無強干中國海防之例兩年以後彼自寂

然此事所關甚鉅不得不再行詳切瀝陳仰懇敕下總理衙門立案永遠不予曲從粵防大局幸甚  
旨該衙門知道欽此

潮綱廢弛委府兼辦片

光緒十二年二月二十五日

再兩廣鹽運分司運同錢璿糊塗濫用欠課甚鉅前經臣之洞奏奉諭旨暫行革職留任勒限運銷在案茲據署廣東布政使蕭韶署兩廣鹽運使蔣澤春詳稱潮橋運同一缺引地行銷廣東之潮州嘉應福建之汀州江西之贛州甯都地聯三省路隔千數百里額引八百二十一程場課餉項一十三萬有奇自咸豐同治年間各

省匪擾引地疲壞埠商倒歇每年奏銷約在七成以上其銷路有大河小河之分行潮嘉汀州者爲大河行贛甯者爲小河大河官代商辦小河商仍埠舊官辦者晒價運脚悉出於官無重資不能周轉商辦者運脚由商晒價由官亦非重資不能接濟每年旺銷全在於冬魚鹽菜鹽百倍口食全在資本充裕於春秋天氣朗晴之時將一年冬銷預爲晒儲官運商運源源往來若旣無餘資又貸重息不及冬季場埠已少存鹽魚菜大宗半飽私販且船戶不加鼓舞挑販無術招徠亦難一律疏暢流通往來鹽務盛時運同印票商號極爲珍貴以故

借易息輕運速課足十數年來銷至七成有餘已形竭蹶至該運同錢瑨不諳綜核又多耗累因其虧欠日鉅商號益復不肯通挪以至運則無費晒則無本雖有可銷之路亦無可售之鹽現查該運同自奏參勒限以後僅將六年分奏銷正餉解足其七年課餉甫經破白未完尙多似此疲累日深必致虧帑無底應請將錢瑨撤任勒限嚴追照例參辦惟揀員接署實難其人各鹽員深知此時難於措手無不視爲畏途竊思此時欲籌補救之方惟有令潮州府知府兼署運同則晒價運脚尙能籌墊巡丁船戶呼應亦靈必能自顧考成力清課項

查潮州府知府朱丙壽公事穩練情形熟習於上年八月委令協同該運同籌運督銷尙能細心考求陸續催解應卽委該府朱丙壽兼署潮州鹽運分司運同責令將以前滯引設法疏銷並飭查明錢瑄任內有無徵課未解及存鹽未銷詳覆核辦庶免潮橋課餉愈久愈誤等情詳請具奏前來臣等查潮橋分司爲粵鹽課餉之大枝其官商兼運章程於通綱大例之外自爲風氣去省遙遠亦非運司之所能代謀大率鹽之晒運皆責於官銷之旺歉惟視資本近年以來官本久未充裕加以錢瑄之昏庸疲玩虧欠尤多若僅將該員參追而不令



籌一變通之策必致潮網大壞不可收拾雖任任參追  
無益於課該司等議令潮州府兼辦實爲因時補救之  
宜除檄飭遵照分別撤任嚴追督飭籌銷外謹合詞附  
片具奏伏祈聖鑒

旨著照所請該部知道欽此

張文襄公全集卷十四終

新城王樹桂校